

ЗАСГИЙН ГАЗРЫН ТУСГАЙ САНГИЙН ТУХАЙ ХУУЛЬД НЭМЭЛТ ОРУУЛАХ ТУХАЙ ХУУЛИЙН ҮР НӨЛӨӨНИЙ ҮНЭЛГЭЭНИЙ ТАЙЛАН, ЗӨВЛӨМЖ

Засгийн газрын тусгай сангийн тухай хуульд нэмэлт оруулах тухай хуулийн төслийн үр нөлөөг Хууль тогтоомжийн тухай хуулийн 13 дугаар зүйл, Засгийн газрын 2016 оны 59 дүгээр тогтоолын 3 дугаар хавсралтаар батлагдсан “Хууль тогтоомжийн төслийн үр нөлөөг үнэлэх аргачлал” -ын дагуу хийж гүйцэтгэлээ.

Засгийн газрын тусгай сангийн тухай хуулийн нэмэлт өөрчлөлтийн төсөл нь Хууль тогтоомжийн төслийн үр нөлөөг үнэлэх аргачлалын /цаашид Аргачлал гэх/ 1 дүгээр зүйлийн 1.2 дахь хэсэгт заасан хууль тогтоомжид хамаарахгүй тул үр нөлөөг үнэлэх ажиллагааг Аргачлалын 1 дүгээр зүйлийн 1.4-т заасан дараах үе шатаар хийсэн болно: Үүнд:

1.4.1.шалгуур үзүүлэлтийг сонгох;

1.4.2.хуулийн төслөөс үр нөлөөг нь тооцох хэсгээ тогтоох;

1.4.3.шалгуур үзүүлэлтэд тохирох шалгах хэрэгслийн дагуу үр нөлөөг тооцох;

1.4.4.үр дүнг үнэлэх, зөвлөмж өгөх.

НЭГ. ШАЛГУУР ҮЗҮҮЛЭЛТ

1.1. Зорилгод хүрэх байдал:

Монгол Улсын Үндсэн хуулийн Арван зургадугаар зүйлийн 11 дэх хэсэгт “...**хүүхдийн ашиг, сонирхлыг төр хамгаална**” гэж, мөн хуулийн Арван есдүгээр зүйлийн 19.1 дэх хэсэгт “...**Төрөөс хүний эрх, эрх чөлөөг хангахуйц эдийн засаг, нийгэм, хууль зүйн болон бусад баталгааг бүрдүүлэх хүний эрх, эрх чөлөөг зөрчихтэй тэмцэх, хөндөгдсөн эрхийг сэргээн эдлүүлэх үүргийг иргэдийнхээ өмнө хариуцна**” гэж тус тус заажээ. Мөн хуулийн Гучин наймдугаар зүйлийн 2 дахь хэсгийн 7-д Засгийн газар нь “**хүний эрх, эрх чөлөөг хамгаалах**, нийгмийн хэв журмыг бэхжүүлэх, гэмт хэрэгтэй тэмцэх арга хэмжээ авч хэрэгжүүлнэ” хэмээн заасан байна.

Энэ дагуу төр, засгийн зүгээс хүүхдийн эрхийг хангах, хамгаалах чиглэлээр тодорхой зорилтууд дэвшүүлэн, хэрэгжүүлж иржээ. Тухайлбал,

- Монгол Улсын Их хурлын 2020 оны 24 дүгээр тогтоолоор батлагдсан Засгийн газрын 2020-2024 оны үйл ажиллагааны хөтөлбөрийн “Хүний хөгжил” 2 дугаар бүлэгт хүүхэд, залуучуудын хөгжлийг дэмжих, аюулгүй амьдрах эрхийг хангах, тэдэнд зориулсан бүтээн байгуулалтыг хэрэгжүүлэх чиглэлээр “2.3.9.1.273 цэцэрлэг ашиглалтад оруулах; 2.3.9.2.200 шинэ сургууль ашиглалтад оруулах; 2.3.9.3.тусгай хэрэгцээт сургууль, цэцэрлэгийн барилгыг шинэчилж, өргөтгөх; 5.8.Гэр бүл, хүүхэд залуучууд, ахмад настан, хөгжлийн бэрхшээлтэй иргэдийн эрхийг дээдэлсэн, нийгмийн бүх бүлгийн оролцоог хангасан хүний хөгжлийн цогц бодлого хэрэгжүүлнэ, “2.6.1.7.Хүүхдийн номын сан, хүүхэлдэйн театр байгуулна” хэмээн заасан.

Дээрх заалтуудыг хэрэгжүүлэх хүрээнд Хүүхдийн төлөө сан байгуулж, хүүхдэд зориулсан бүтээн байгуулалтыг санхүүжүүлэх эх үүсвэрийг бүрдүүлэх, хүүхдийн

хөгжлийг дэмжсэн үйл ажиллагааг үндэсний хэмжээнд нэгдсэн удирдлага, зохион байгуулалтаар ханган ажиллах шаардлагатай байна.

1.2. Практикт хэрэгжих боломж:

Засгийн газрын тусгай сангийн тухай хууль, Хүүхдийн эрхийн тухай хуульд хүүхдийн төлөө сангийн үйл ажиллагааг тогтвортой болгох үүднээс аж ахуйн нэгж, байгууллагаас хандив, тусламж авах, тээврийн хэрэгслийн сонирхол татсан улсын дугаарын дуудлага худалдааны орлогыг төвлөрүүлэх зохицуулалтыг тусгаснаар улсын төсөвт учрах дарамт багасгаж, сангийн мөнгөн хуримтлал өсч хүүхдийн төлөөх бүтээн байгуулалтыг бий болгох санхүүжилт бүрдэнэ. Тухайлбал, тээврийн хэрэгслийн сонирхол татсан улсын дугаарын дуудлага худалдааны орлогоос 387,0 саяас 6,0 тэрбум хүртэлх төгрөг Хүүхдийн төлөө санд хуримтлагдах боломжтой байна.

Иймд Зам тээвэр, хөгжлийн яамнаас гаргасан шийдвэр, тооцоо судалгаанд үндэслэн Автотээврийн тухай хуулийн 17^{1.3} дугаар зүйлд “Автотээврийн хэрэгслийн сонирхол татахуйц улсын бүртгэлийн дугаарыг үнэ хаялцуулах дуудлага худалдаагаар борлуулж болно”, 17^{1.4} дугаар зүйлд “Автотээврийн хэрэгслийн сонирхол татахуйц улсын бүртгэлийн дугаар борлуулсны орлогыг Хүүхдийн төлөө санд төвлөрүүлнэ.” гэсэн заалтыг тус тус нэмж, Хүүхдийн төлөө санд төвлөрүүлэх хөрөнгийн эх үүсвэрийг тодорхойлж байна. Иймд уг хууль практикт хэрэгжих боломжтой юм.

1.3. Ойлгомжтой байдал:

Монгол улсын нийт хүн амын 36.8 хувийг 0-18 хүртэлх насны хүүхэд эзэлж байгаа бөгөөд тэдний 35.0 хувь нь өсвөр насны хүүхдүүд байна. Өсвөр насны хүүхдүүдэд чиглэсэн хөгжлийн үйлчилгээ, чөлөөт цагаа зөв боловсон өнгөрүүлэх орчин хангалтгүй байгаа нь тэднийг гэмт хэрэг зөрчил үйлдэх, гэмт хэрэгт холбогдох, гэрч хохирогч болох, цахим донтолт, цахим орчинд бэлгийн дарамт хүчирхийлэл, бэлгийн мөлжлөгт өртөхөд нөлөөлж байна. Тухайлбал, манай улсад сүүлийн 10 жилийн хугацаанд хүн худалдаалах гэмт хэргийн хохирогч 94 бүртгэгдсэний 25,0 хувийг хүүхэд эзэлж байна. Мөн хүүхэд оролцсон гэмт хэрэг 2016 онд 1165 байсан бол 2019 онд 1356 болж 16,4 хувиар, гэмт хэргийн улмаас хохирсон хүүхэд 2016 онд 1340 байсан бол 2019 онд 1598 болж, 19,3 хувиар тус тус өссөн байгаа нь хүүхэд, өсвөр үеийнхний хөгжил, оролцоог дэмжсэн, амьдрах ур чадвар олгох, чөлөөт цагийг зөв боловсон өнгөрүүлэх орчин нөхцөлийг бүрдүүлэх шаардлагатайг харуулж байна.

2020 оны байдлаар улсын хэмжээнд 41 хүүхдийн зуслан үйл ажиллагаа явуулж байгаа ба эдгээр зуслангаас 60 хувь нь барилга байгууламжийн хувьд хуучирч муудсан, 21-ээс дээш жил үйл ажиллагаа явуулж байна. Нийслэлийн хэмжээнд 20, орон нутгийн хэмжээнд 21 зуслан ажиллаж, улсын өмчит зуслан 12, орон нутгийн өмчит улсын үйлдвэрийн зуслан 3, төрийн өмчит 3, хувийн 25 зуслан байна. Жилдээ 70,000 гаруй хүүхэд зусланд хамрагддаг ба энэ нь зусланд хамрагдах 7-18 насны 600 мянга гаруй хүүхдийн дөнгөж 12 хувийг эзэлж байна.

Жил бүрийн улсын төсөвт батлагдаж буй хүүхдийн хөгжил, хамгааллын хөтөлбөрийн зардал нь Хүүхэд хамгааллын тухай хуулийн 10 дугаар зүйлд заасан хүүхэд хамгааллын хариу үйлчилгээ, урьдчилан сэргийлэх үйлчилгээнд зарцуулагддаг тул хүүхдийн хөгжлийг дэмжиж, хүүхдэд зориулсан хөрөнгө оруулалт, бүтээн байгуулалтыг улсын төсвөөс бүрэн шийдвэрлэхэд хүндрэлтэй байдаг.

Монгол улсын төр засаг, ард иргэдээс хүүхдийн сайн сайхны төлөө санаачлага гаргаж, асуудлыг шийдвэрлэж ирсэн түүхтэй бөгөөд энэхүү үйл хэргийг уламжлал болгон хэрэгжүүлэх шаардлага тулгарч байна.

Анх 1972 онд МАХН-ын Төв хороо, БНМАУ-ын Сайд нарын Зөвлөлийн “Хүүхдийн төлөө төв фонд байгуулах тухай, Улаанбаатар Төмөр замын хамт олны уриалгыг дэмжих тухай” 30 дугаар тогтоолоор батлагдаж, Ардын боловсролын яам, Эрүүлийг хамгаалах яамны коллеги, МХЗЭ-ийн Төв хорооны товчооны 1973 оны 04 дүгээр сарын 24-ний өдрийн “Хүүхдийн төлөө Фондын комисс байгуулах тухай” хамтарсан хурлын 108/177/15 дугаар шийдвэрийн дагуу А.И.Цэдэнбал Филатова даргатай Хүүхдийн төлөө фондын комиссын бүрэлдэхүүн болон комиссын дүрмийг тус тус баталсан байна.

Хүүхдийн төлөө фондын хөрөнгөөр 1975 оноос 1994 оныг хүртэлх 20 жилийн хугацаанд хүүхдийн 68 цэцэрлэг, 10 гаруй эмнэлэг, пионерийн 70 гаруй зуслан, Хуримын ордон, Монголын Хүүхдийн ордон, Залуу техникчдийн ордон, Усан бассейн, Олон улсын Хүүхдийн Найрамдал зуслан, Монголын Хүүхэд асран хүмүүжүүлэх төв, Бамбарууш кафе, Хүүхдийн төв номын сан, Хүүхдийн театр, Хүүхэддэйн театр, Хүүхэд залуучуудын парк, Хүүхдийн шүдний поликлиник гэх мэт 200 гаруй бүтээн байгуулалтыг бий болгож, хүүхдийн эрх, хөгжлийг дэмжихэд үнэтэй хувь нэмэр оруулсан түүхтэй билээ.

Монгол Улс төвлөрсөн төлөвлөгөөт эдийн засгаас зах зээлийн эдийн засагт шилжсэн 1990 оноос хойш өмч хувьчлал өрнөж, төрийн өмчийг хувьчлахад хүүхдийн нэртэй 145 барилга, байгууламж хувьчлагдсан байна. Тухайлбал, Хүүхдийн номын сан, Элдэв-Очирын нэрэмжит Хүүхдийн кино театр, Хүүхдийн театр, Бамбарууш кафе, Хүүхэд, залуучуудын театр, хүүхдийн зуны зуслангууд, Залуу техникчдийн ордон гэх мэт хүүхдийн хөгжлийг дэмжсэн томоохон барилга байгууламжийг дурдаж болно.

1996 онд батлагдсан Хүүхдийн эрхийг хамгаалах тухай хуульд заасны дагуу 2005 онд Хүүхдийн төлөө сан нь Хүүхдийн төлөө Үндэсний зөвлөлийн дэргэд байгуулагдахаар шийдвэрлэгдэж, Засгийн газрын тусгай сангийн тухай хуулийн 5 дугаар зүйлийн 5.4.17-д хүүхдийн төлөө сантай байхаар хуульчлан, Засгийн газрын 2005 оны 40 дугаар тогтоол, 2008 оны 261 дүгээр тогтоолоор “Хүүхдийн төлөө сангийн дүрэм, сангийн удирдах зөвлөлийн бүрэлдэхүүн”-ийг батлан ажиллаж, байсан ч 2015 онд Засгийн газрын тусгай сангийн тухай хуулийн нэмэлт өөрчлөлтөөр Хүүхдийн төлөө сангийн зориулалт, зарцуулалт нь тодорхойгүй шалтгаанаар хүчингүй болсон байна.

Хүүхдийн эрхийн тухай хуулийн 12 дугаар зүйлд Засгийн газрын бүрэн эрхийг тодорхойлсон байх ба хуулийн 12.1.1. хүүхдийн **эрхийг хамгаалах** төрийн бодлого боловсруулах;

12.1.2. хүүхдийн **эрхийг хамгаалах** хууль тогтоомжийн биелэлтийг хангах;

12.1.3. хүүхдийг **хөгжүүлэх, тэдний эрхийг хамгаалах** талаар үндэсний хөтөлбөр, төлөвлөгөө боловсруулан баталж, хэрэгжүүлэх арга хэмжээ авах;

16 дугаар зүйлд хүүхдийн эрхийг хангах талаарх салбар дундын үйл ажиллагааг үндэсний болон орон нутгийн түвшинд уялдуулан зохицуулах Хүүхдийн төлөө үндэсний болон орон нутгийн зөвлөлтэй байхыг тус тус заасан.

Бид Засгийн газрын тусгай сангийн тухай хуульд нэмэлт оруулах хуулийн төслийг дагалдуулан Хүүхдийн эрхийн тухай хуульд “16.6. Хүүхдэд зориулсан бүтээн байгуулалт, хүүхдийн хөгжлийг дэмжих зориулалт бүхий Хүүхдийн төлөө сантай байна.” гэсэн заалтыг нэмэлтээр оруулахаар тус хуулинд нэмэлт оруулах тухай хуулийн төслийг боловсруулаад байна.

1.4. Хүлээн зөвшөөрөгдөх байдал:

Хүүхдийн төлөө санг сэргээж, сангийн хөрөнгийг хүүхдэд зориулсан хөрөнгө оруулалт, бүтээн байгуулалт, тив дэлхийн соёл, урлаг, спортын уралдаан, тэмцээнд амжилт гаргасан хүүхдийг урамшуулахад зарцуулснаар хүүхэд өсвөр үеийнхний хөгжил, оролцоог дэмжиж, чөлөөт цагаа зөв боловсон өнгөрөөх орчин, үйлчилгээний хүртээмж нэмэгдэж, тэднийг эрсдэлээс урьдчилан сэргийлэх, хамгаалахад чухал нөлөө үзүүлнэ. Тухайлбал,

Монгол Улсын Их хурлын 2020 оны 24 дүгээр тогтоолоор батлагдсан Засгийн газрын 2020-2024 оны үйл ажиллагааны хөтөлбөрийн хэрэгжилтийн хүрээнд Хүүхдийн төлөө сангийн санхүүжилтээр Хүүхдийн номын сан, Хүүхэлдэйн театр, Засгийн газрын 2020 оны 205 дугаар тогтоолын хэрэгжилтийн хүрээнд Олон Улсын Хүүхдийн Найрамдал 2 зусланг барьж байгуулахад сангийн хөрөнгийг зарцуулснаар хүүхдийн хөгжих, оролцох эрх хангагдаж, хөгжлийн үйлчилгээний хүртээмж нэмэгдэж, улмаар иргэд, олон нийтэд хүлээн зөвшөөрөгдөж, нийгэмд эерэг нөлөө бий болно гэж үзэж байна.

1.5.

Зардал:

Засгийн газрын тусгай сангийн тухай хууль болон Хүүхдийн эрхийн тухай хуульд нэмэлт оруулах тухай хуулийн төслийн хүрээнд Хүүхдийн төлөө сангийн үйл ажиллагааг тогтвортой болгох үүднээс аж ахуйн нэгж, байгууллага, иргэдээс хүүхдийн төлөө өгсөн хандив, тусламжийг хуримтлуулах, хүүхдэд зориулсан бүтээн байгуулалтыг дэмжсэн соёл урлаг, спортын тоглолтын орлого, тээврийн хэрэгслийн сонирхол татсан улсын дугаарыг үнэ хаялцуулан борлуулах дуудлага худалдааны орлогыг төвлөрүүлэх зохицуулалтыг тусгаснаар улсын төсөвт учрах дарамт багасгаж, сангийн мөнгөн хуримтлал өсч хүүхдийн төлөөх бүтээн байгуулалтыг бий болгох санхүүжилт бүрдэнэ. Тухайлбал, тээврийн хэрэгслийн сонирхол татсан улсын дугаарын дуудлага худалдааны дугаарын босго үнийг 50,0 мянган төгрөг гэж тооцоход 387,0 саяас 6,0 тэрбум хүртэлх төгрөг Хүүхдийн төлөө санд хуримтлагдах боломжтой байна.

Хүүхдийн төлөө санг бий болгосноор улсын төсөвт хүндрэл учруулахгүйгээр хүүхдийн төлөөх хөрөнгө оруулалт бүтээн байгуулалтыг санхүүжүүлэх боломж бүрдэнэ.

1.6. Харилцан уялдаа

Засгийн газрын тусгай сангийн тухай хуульд нэмэлтээр оруулах зүйл заалт нь өөр хоорондоо болон одоо хүчин төгөлдөр үйлчилж байгаа бусад хууль тогтоомжтой нийцэж байгаа бөгөөд хүүхэд, гэр бүлийн хөгжлийн асуудал хариуцсан төр захиргааны төв байгууллагын чиг үүрэгт туссан төдийгүй өөр байгууллагын чиг үүрэгтэй давхцаагүй болно.

№	Асуулт	Хариулт
1.	4.10.1.Хуулийн төслийн зохицуулалт тухайн хуулийн зорилттой нийцэж буй эсэх	Засгийн газрын тусгай сангийн тухай хуулийн зорилттой нийцсэн.
2.	4.10.2. Хуулийн төслийн Хууль тогтоомж гэсэн хэсэгт заасан хуулиудын нэр тухайн харилцаанд хамаарах хууль мөн эсэх	Мөн
3.	4.10.3. Хуулийн төсөлд тодорхойлсон нэр томъёо тухайн хуулийн төслийн болон бусад хуулийн нэр томъёотой нийцэж байгаа эсэх	Нийцсэн.
4.	4.10.4. хуулийн төслийн зүйл, заалт тухайн хуулийн төсөл болон бусад хуулийн заалттай нийцэж байгаа эсэх;	Нийцсэн.
5.	4.10.5.хуулийн төслийн зүйл, заалт тухайн хуулийн төслийн болон бусад хуулийн заалттай давхардсан эсэх;	Давхардаагүй.
6.	4.10.6.хуулийн төслийг хэрэгжүүлэх этгээдийг тодорхой тусгасан эсэх;	Хэрэгжүүлэгч нь Хүүхдийн эрхийн тухай хуульд зааснаар Хүүхдийн төлөө үндэсний зөвлөл болон хүүхэд, гэр бүлийн хөгжлийн асуудал эрхэлсэн Засгийн газрын гишүүн байна.
7.	4.10.7.хуулийн төсөлд шаардлагатай зохицуулалтыг орхигдуулсан эсэх;	Үгүй
8.	4.10.8.хуулийн төсөлд төрийн байгууллагын гүйцэтгэх чиг үүргийг давхардуулан тусгасан эсэх;	Үгүй
9.	4.10.9.төрийн байгууллагын чиг үүргийг төрийн бус байгууллага, мэргэжлийн холбоодоор гүйцэтгүүлэх боломжтой эсэх;	Хүүхдийн төлөө сангийн зохицуулалтыг ТББ гүйцэтгэх боломжгүй.
10.	4.10.10.татварын хуулиас бусад хуулийн төсөлд албан татвар, төлбөр, хураамж тогтоосон эсэх;	Үгүй
11.	4.10.11.тухайн хуулийн төсөлд тусгасан тусгай зөвшөөрөлтэй холбоотой зохицуулалтыг Аж ахуйн үйл ажиллагааны тусгай зөвшөөрлийн тухай хуульд тусгасан эсэх;	Хамааралгүй
12.	4.10.12.Монгол Улсын Үндсэн хууль	Хүний эрхийг хязгаарласан

	болон Монгол Улсын олон улсын гэрээнд заасан хүний эрхийг хязгаарласан зохицуулалт тусгасан эсэх;	зохицуулалт тусгаагүй.
13.	4.10.13.хуулийн төслийн зүйл, заалт жендэрийн эрх тэгш байдлыг хангасан эсэх;	Жендэрийн тэгш бус байдлыг хөндөөгүй.
14.	4.10.14.хуулийн төсөлд шударга бус өрсөлдөөнийг бий болгоход чиглэсэн заалт тусгагдсан эсэх;	Үгүй
15.	4.10.15.хуулийн төсөлд авлига, хүнд суртлыг бий болгоход чиглэсэн заалт тусгагдсан эсэх;	Үгүй
16.	4.10.16.хуулийн төсөлд тусгасан хориглосон хэм хэмжээг зөрчсөн этгээдэд хүлээлгэх хариуцлагын талаар тодорхой тусгасан эсэх.	Үгүй

Засгийн газрын тусгай сангийн тухай хуулийн 5 дугаар зүйлийн 5.5 дахь хэсэгт заасан Тусгай санг шинээр байгуулахад тавигдах шаардлагыг хангасан байдал:

№	Засгийн газрын тусгай сангийн тухай хуулийн 5 дугаар зүйлийн 5.5 дахь хэсэгт заасан шаардлага	Хариулт
1.	5.5.1.тусгай санг бүрдүүлэх эх үүсвэр тодорхой байх;	Хуулийн төслийн 21 ² .2 дугаар зүйлд сангийн хөрөнгийн эх үүсвэрийг тээврийн хэрэгслийн улсын дугаарын үнэ хаялцуулах дуудлага худалдаанаас олсон орлого болон хүүхдийн сайн сайхны төлөө зохион байгуулсан соёл, урлагийн тоглолт, спортын арга хэмжээний орлогоос бүрдүүлэхээр тодорхойлсон.
2.	5.5.2.тусгай санг энэ хуулийн 6.1.1-д зааснаас бусад эх үүсвэрээс бүрдүүлсэн байх;	Хүүхдийн төлөө сангийн эх үүсвэр нь хүүхдэд зориулсан бүтээн байгуулалтыг дэмжсэн соёл урлаг, спортын тоглолтын орлого, Автотээврийн хэрэгслийн сонирхол татахуйц улсын бүртгэлийн дугаар борлуулсны орлогоос бүрдэнэ.
3.	5.5.3.дунд хугацаанд тогтвортой үйл ажиллагаа явуулах;	Автотээврийн хэрэгслийн сонирхол татахуйц улсын бүртгэлийн дугаар борлуулсны орлогоос жилдээ 387,0 саяас 6,0 тэрбум төгрөг төвлөрөх боломжтой тул сангийн үйл ажиллагаа тогтвортой байна.
4.	5.5.4.төсвийн ерөнхийлөн захирагчийн тухайн жилийн төсөвт хөтөлбөр хэлбэрээр тусган хэрэгжүүлэх боломжгүй байх;	Хүүхдийн эрхийг хамгаалах, эрсдэлээс урьдчилан сэргийлэх, хамгааллын хариу үйлчилгээ үзүүлэхэд зарцуулах төсөв улсын төсөвт тусгагддаг ба хүүхдэд зориулсан бүтээн байгуулалтын зардал

		тусгагддаггүй болно.
5.	5.5.5.бусад тусгай сангийн үйл ажиллагаатай давхардаагүй байх;	Давхардаагүй
6.	5.5.6.холбогдох тооцоо, судалгаанд үндэслэсэн байх	Авто тээврийн үндэсний төвөөс хийсэн судалгаанд автотээврийн улсын бүртгэлийн нийслэлийн 396, орон нутгийн 18 дугаарыг захиалах эрхийг дуудлага худалдаанд үнэ хаялцуулан борлуулсан орлогыг дуудлага худалдааны босго үнийн дүнгээр тооцоход жилд 387.0 сая төгрөгөөс 6.0 тэрбум төгрөгийн хөрөнгийн эх үүсвэр бүрдэхээр тооцоолол гарсан байна.

1.7. Үр нөлөө:

1. Засгийн газрын тусгай сангийн тухай хуульд нэмэлт оруулж, Хүүхдийн төлөө санг бий болгосноор Хүүхдийн төлөө сангийн бүрдүүлэлт, зарцуулалтын эрх зүйн орчин боловсронгуй болж, сангийн үйл ажиллагаа олон нийтэд нээлттэй, бодитой хэрэгжих боломж бүрдэнэ.

2. НҮБ-ын Хүүхдийн эрхийн хорооны “Хүүхдийн эрх ба бизнесийн зарчим”-ийн хэрэгжилтийг хангаж, иргэн, аж ахуйн нэгж, байгууллагаас нийгмийн хариуцлагын хүрээнд хүүхдийн төлөө төлөө өгсөн хандив, тусламжийн хөрөнгө нэгдсэн зохицуулалтаар хэрэгтэй үйл ажиллагаанд хяналттай зарцуулагдаж, хүүхдийн эрхийн төлөө иргэн, аж ахуйн нэгжийн оролцоог нэмэгдэхийн зэрэгцээ Хүүхдийн төлөө санд хуримтлал бий болох, улсын төсөвт хүүхдийн чиглэлийн бүтээн байгуулалтыг санхүүжүүлэхэд дэмжлэг болно.

3. Хүүхдийн эрхийн тухай хуулийн 12.1.5 дахь “хүүхдийн санаачилсан шинэ бүтээл, урлаг, спортын чиглэлээр улс, олон улс, тив, дэлхийн чанартай уралдаан, тэмцээнд оролцох болзол хангасан болон амжилт гаргасан хүүхдэд дэмжлэг үзүүлэх, шагнаж урамшуулах журмыг Засгийн газар батална” гэсэн заалтыг хэрэгжүүлэх санхүүжилт шийдвэрлэгдэж, төрөөс хүүхдийн авьяас чадвар, хөгжлийг дэмжих үйл ажиллагаа илүү бодитой болно.

4. Хүүхдэд зориулсан бүтээн байгуулалтууд бий болж, хүүхэд, өсвөр үе залуучуудын чөлөөт цагаа өнгөрүүлэх орчин нэмэгдэж, хүүхдийн хөгжих, аюулгүй орчинд амьдрах эрх хангагдана.